

Kosmo! terima Anugerah Berita Air

SYALMIZI HAMID

27 September 2019 11:33 AM



Zakiyuddin (empat dari kanann) dan Jaseni (lima dari kanan) bergambar bersama pemenang anugerah.

GEORGE TOWN - Akhbar Kosmo! menerima Anugerah Berita Air pada Majlis Malam Media Perbadanan Bekalan Air Pulau Pinang (PBAPP) 2019 di sini malam tadi.

Anugerah tersebut diberikan berikutan laporan 'Bekalan air bersih di tiga negeri terancam' yang disiarkan akhbar Kosmo! pada 21 Januari tahun lalu.

Hadiah disampaikan oleh Ketua Pegawai Eksekutif PBA Holdings Bhd., Datuk Ir. Jaseni Maidinsa kepada Ketua Biro Utusan Malaysia Pulau Pinang, Mohd. Khuzairi Ismail yang mewakili Kosmo! pada majlis tersebut.

Hadiah berupa cek bernilai RM1,000 itu akan diserahkan kepada badan amal terpilih. Turut hadir ialah Timbalan Ketua Menteri 1, Datuk Zakiyuddin Abdul Rahman.

Sementara itu, Zakiyuddin berkata, laporan-laporan berita mengenai isu air telah membantu menghentikan pembalakan di Ulu Muda, mencegah pencemaran air di Sungai Muda dan memulakan semula rundingan mengenai Skim Penyaluran Air Mentah Sungai Perak (SPRWTS).

"Jika kita lihat laporan berita mengenai Ulu Muda, Sungai Muda dan SPRWTS pada 2018 dan 2019, laporan media massa telah membantu mencapai keputusan yang positif.

"Ulu Muda adalah kawasan hutan hujan yang kurang diketahui di Kedah sehinggalah media massa membantu Pulau Pinang dan PBAPP dengan memaparkan kepentingannya sebagai kawasan tadahan air utama bagi Perlis, Kedah dan Pulau Pinang," katanya. - K! ONLINE